

Arbouriculturo

La soucieta d'ourticulturo e d'arbouriculturo di Bouco-de-Rose a soun sèti dins la bastido dóu pargue Bortoli à Marsiho. En mai d'uno couleicioun d'un trentenau d'oulivié, un fube de planto de touto meno grèion dins aquéu jardin. **pajo 6.**



Prouvènço aro

Tóuti li mes, lou journau de la Prouvènço d'aro

Desèmbre 2007

n° 228

2,10 3

De l'escrituro

Escriéure es boumbi foro dóu rèng di murtrié

« Escriéure es boumbi foro dóu rèng di murtrié » disié Kafka.

“Aprene à escriéure” talo èro la fourmulo qu'acabave un mot de bihet en setèmbre, ço que me counvido, vuei, à reboumbi en me virant pèr acò faire vers quaucun, qu'en 1984, ié counsacrave un assai biougrafi : Petrarco (1304 – 1374) Aquéu d'aquí, mai que degun, sara esta, tout de long de sa vido, un eros de l'escrituro, miés que viéure, escriéu; ansin que nous lou fiso éu-meme: quouro manjo, escriéu; quouro ié fan la barbo, escriéu; à chivau, avié trouba lou biais d'utilisa l'escritòri; alounga à l'ombro d'un aubre, escriéu.

Fau legi la letro 12 dóu libre XXI di “Familiario”, ounte pintè pèr lou menu soun biais d'escriéure dins la vido vidanto. Fau tourna legi aquéli pajò de sa courrespondènci ounte celebrè lou calame coume simbèu lou mai presa de soun mejan d'expressioun. Es lou CALAMUS éu-meme que se dis alassa, en se fasènt vièi, o au contro impaciènt de se tourna groupa à l'obro.

Es dins aquel ate creatour – escriéure – que Petraco troubè de douçour infinido (dulcedo in scribendo). Lou jour juste de si 70 an – 18 de juliet de 1374 – s'afoundrè, vincu pèr lou lassùgi, sus lou manuscri de la « vido de Cesar » qu'èro en trin de caligrafica. Relico esmouvènto, counservado à la B.N. Paris-latin n°5784.

*

Tóuti lis afouga de l'Age-mejan counèisson uno pèço qu'a pèr titre « l'Indovinello Veronese », escricho tre la fin dóu siècle VIII o la debuto dóu siècle IX. Aquí, en meno de parabolo, s'atrobe ilustra la founcioun d'escrituro:

*Boves se parba
et albo versatorio tenaba.
Alta pratalia araba
et negro semen seminaba*

ounte s'agis di dous iue dóu “scriptor” (li biòu) que countourolon la rèio, valènt-à-dire lou calame qu'entameno lou sòu qu'es pèr laura, autramen di lou velin que soun blanc l'aparo. Enfin, es la semènço que l'escritour expandis: li caratèrè d'encro que van semena lou pergamin vierge.

Aquéu tèste foundatour, i raro di lengo latino e italiano, asseto au lindau de nosto civilisacioun éuropenco, lou noble d'un geste, uman que noun-sai, aquéu d'escriéure.

Pau Amargier (Reviraduro PB)

La Mediterragno



Mar nostro

Lou presidènt se jito à l'aigo pèr l'Union de la Mediterragno.

Pajo 2

Lis Santounié

Lou Saloun internaciounau di Santounié expandis sis espousicioun en Arle.

Pajo 5

Oai e liberta

Es lou titre dóu nouvèu disque dóu Massillia Sound System.

Pajo 8

D'aquéli Bèlge!

Se n'ia que se fan de marrit sang pèr l'aveni de la Belgico e de si lengo minouritari, an bèn tort.

Se l'alemand au Levant, lou francès dins d'uni coumuno à l'entour de Brussello o dins li Fouroun se trobon en minourita e se li Flamand que demandon soun independènci an qu'uno idèio : li faire disparèisse e impausa lou flamand de pertout mounte podon (ço que fan deja dins li Fouroun), aquéli lengo an pamens ges de soucit à se faire.

De pichot finocho an trouba dequé rassegura lou mounde ! D'efèt, se la Flandro vèn independènto e que vòu èstre mèmbe de l'Europo (ço qu'es prouvable) rintrara, alor, dins l'encastre di nouvèus aderènt que soun dins l'oubliacioun de signa, de ratifica e d'aplica la famouso Carto Europenco di Lengo regiounalo o minouritari. E la Flandro aura dounc lou devé e l'oubliacioun d'apara e de proumoure lou francès dins li cantoun francoufone de soun territòri, lou waloun en Walounio, etc. Lou pèis que se mord la co !!! E nautre sian rassegura...

P. B.